

cipit, vestit, pascit, et apud impatientiam irati fratris excusat. »

Secundus patientiæ fructus, est dilectio, sive caritas.

« Dilectio summum fidei Sacramentum, Christiani nominis thesaurus, quam Apostolus totis viribus Spiritus Sanctus commendat, cujus nisi patientiæ disciplinæ eruditur? »

Primo, « dilectio, ait, magnanimis est: ita patientiam sumit. »

Secundo, « benefica est: malum patientia non facit. »

Tertio, « non emulatur: id quidem patientiæ proprium est. »

Quarto, « nec superbum sapit: modestiam de patientia trahit. »

Quinto, « non inflatur, non protervit: et hoc ad patientiam pertinet. »

Sexto, « non irritatur, omnia sustinet, omnia tolerat: utique, quia patiens est. »

Septimo, « merito ergo nunquam excidet; exhauriantur lingue, scientiæ, prophetiæ, permanent fides, spes, dilectio: fides, quam Christi patientia induxit; spes, quam hominis patientia expectat; dilectio, quam Deo magistro patientia comitatur. »

Tertius, est, quod patientia suggerat pietatis exercitia, cap. XIII.

« Quæ est negotiatio patientiæ in corpore? »

Primo, « afflictatio carnis, hostia Domino placatoria. »

Secundo, « jejunia cum cinere et sacco conjuncta. »

Tertio, « preces et deprecationes. »

Quarto, « continentia carnis. »

Quinto, « constantia sub cruce. »

Exempla sunt. « Secatur Isaias, patientiæ viribus armatus, et de Domino non tacet; lapidatur Stephanus, et veniam hostibus suis postulat: Job omnem patientiæ speciem, adversus omnem diaboli vim expungit, quem non abacti greges, non filii uno ruinæ impetu adepti, non corporis cruciatus a patientia exclusit: quale in illo viro feretrum Deus de diabolo extraxit? quale vexillum gloriæ, cum ille homo ad omnem acerbum nun-

tium, nihil ex ore promeret, nisi Deo gratias? quid? ridebat Deus; quid? dissecabatur Satan.

Hinc omnia duplicia recuperavit. »

Quartus est, quod patientia cæteras virtutes parit, cap. XIV.

Primo, « humilitatem instruit. »

Secundo, « penitentiam expectat. »

Tertio, « exomologesin assignat. »

Quarto, « carnem regit. »

Quinto, « spiritum servat. »

Sexto, « linguam frenat. »

Septimo, « manum continet. »

Octavo, « tentationes conculcat. »

Nono, « scandala pellit. »

Decimo, « martyrium consummat. »

Undecimo, « pauperem consolatur, divitem temperat. »

Duodecimo, « servum domino, dominum Deo commendat. »

Decimo tertio, « feminam exornat, virum approbat; amatur in puero, laudatur in juvene, suscipitur in senes; in omni sexu, in omni ætate formosa est. »

Octavo, patientiæ effigiem ita ad vivum depingit, cap. XV.

Primo: « Vultus illi tranquillus et placidus. »

Secundo, « frons pura, nulla meroris aut iræ rugositate contracta. »

Tertio, « supercilia in lætum modum remissa. »

Quinto, « os taciturnitatis rubore signatum. »

Sexto, « color qualis securis et innoxius. »

Septimo, « motus frequens capitis in diabolum, et minax risus. »

Octavo, « amictus circum pectora candidus, et corpori impressus, ut qui nec inflatur, nec inquietatur. »

Nono, sedet in throno spiritus ejus mitissimi, qui non turbine glomeratur, non nubilo livet, sed est teneræ serenitatis, apertus et simplex, quem tertio vidit Elias; nam ubi Deus, ibi et alumna ejus, patientia scilicet: cum ergo spiritus Dei descendit, individua patientia comitatur eum. »

CAPUT TERTIUM.

SYNOPSIS CAPITIS.

Moses pascens oves Jethro, vocatur a Domino in rubo ardente et incubusto; ab eoque mittitur ad Pharaonem, ut liberet Hebræos. Secundo, vers. 13, rogat nomen Dei, qui ait: Ego sum qui sum

1. Moses autem pascens oves Jethro soceri sui, sacerdotis Madian: cumque immasset gregem ad interiora deserti, venit ad montem Dei Horeb. 2. Apparuitque ei Dominus in flamma ignis de medio rubi, et videbat quod rubus arderet, et non combureretur. 3. Dixit

ergo Moyses: Vadam, et video visionem hanc magnam, quare non comburatur rubus. 4. Cernens autem Dominus quod pergeret ad videndum, vocavit eum de medio rubi, et ait: Moyses, Moyses. Qui respondit: Adsum. 5. At ille: Ne appropies, inquit, huc; solve calcamentum de pedibus tuis: locus enim, in quo stas, terra sancta est. 6. Et ait: Ego sum Deus patris tui, Deus Abraham, Deus Isaac, et Deus Jacob. Abscondit Moyses faciem suam: non enim audebat aspicere contra Deum. 7. Cui ait Dominus: Vidi afflictionem populi mei in Ægypto, et clamorem ejus audivi propter duritiam eorum qui præsumunt operibus: 8. et sciens dolorem ejus, descendi ut liberem eum de manibus Ægyptiorum, et educam de terra illa in terram bonam, et spatiosam, in terram quæ fluit lacte et melle, ad loca Chanaanai, et Hethai, et Amorrhæi, et Pherezæi, et Hevæi, et Jebusæi. 9. Clamor ergo filiorum Israel venit ad me: vidique afflictionem eorum, qua ab Ægyptiis opprimuntur. 10. Sed veni, et mittam te ad Pharaonem, ut educas populum meum, filios Israel, de Ægypto. 11. Dixitque Moyses ad Deum: Quis sum ego ut vadam ad Pharaonem, et educam filios Israel de Ægypto? 12. Quis dixit ei: Ego ero tecum, et hoc habebis signum, quod miserim te: Cum eduxeris populum meum de Ægypto, immolabis Deo super montem istum. 13. Ait Moyses ad Deum: Ecce ego vadam ad filios Israel, et dicam eis: Deus patrum vestrorum misit me ad vos. Si dixerint mihi: Quod est nomen ejus? quid dicam eis? 14. Dixit Deus ad Moysen: Ego sum qui sum. Ait: Scie dices filiis Israel: Qui est, misit me ad vos. 15. Dixitque iterum Deus ad Moysen: Hæc dices filiis Israel: Dominus Deus patrum vestrorum, Deus Abraham, Deus Isaac, et Deus Jacob, misit me ad vos; hoc nomen mihi est in æternum, et hoc memoriale meum in generationem et generationem. 16. Vade, et congrega seniores Israel, et dices ad eos: Dominus Deus patrum vestrorum apparuit mihi, Deus Abraham, Deus Isaac, et Deus Jacob, dicens: Visitans visitavi vos, et vidi omnia quæ acciderunt vobis in Ægypto: 17. et dixi ut educam vos de afflictione Ægypti, in terram Chanaanai, et Hethæi, et Amorrhæi, et Pherezæi, et Hevæi, et Jebusæi, ad terram fluentem lacte et melle. 18. Et audient vocem tuam; ingredierisque tu, et seniores Israel, ad regem Ægypti, et dices ad eum: Dominus Deus Hebræorum vocavit nos; ibimus viam trium dierum in solitudinem, ut immolemus Domino Deo nostro. 19. Sed ego scio quod non dimittet vos rex Ægypti ut eatis, nisi per manum validam. 20. Extendam enim manum meam, et percutiam Ægyptum in cunctis mirabilibus meis, quæ facturum sum in medio eorum; post hæc dimittet vos. 21. Daboque gratiam populo huic coram Ægyptiis; et cum egrediemini, non exhibitis vacui: 22. sed postulabit mulier a vicina sua, et ab hospita sua, vasa argentea et aurea, ac vestes; ponetisque eas super filios et filias vestras, et spoliabitis Ægyptum.

Vers. 1. MOYSES AUTEM PASCENS OVES JETHRO. — Per 40 annos quibus in Madian vixit, Moses fuit pastor ovium; totidem deinde annis fuit pastor et dux populi. « Est enim pastoralis ars (ait Philo) præludium ad regnum, hoc est ad regimen hominum, gregis mansuetissimi. Solus potest esse rex usquequaque perfectus, qui bene calleat artem pastoriam, et curando minima animalia, didicit quomodo præesse debeat præstantioribus. » Sic Saul pascens asinas, a Samuele unctus est in regem; sic et David ab ovibus ad regnum est vocatus: hinc et Homerus Agamemnonem vocat ποιμήν λαῶν, pastorem populorum.

Triplici hoc quadragenario quasi consecrata est vita Mosis: vixit enim in aula Pharaonis 40 annis; inde fuga elapsus, pavit oves Jethro in

Madian 40 rursus annis, ut patet Actor. vii, 30. Tertio ex Madian rediens in Ægyptum, dux fuit populi in deserto per 40 ultimos vite sue annos: ita Eusebius. Mortuus est enim Moses anno ætatis 120, Deut. cap. ult.

Quæres, quid his 40 annis egerit Moses? Respondet Philo, primo, eum pascendo oves didicisse pascere et regere populum; secundo, eum se exercuisse in philosophia et sapientia; tertio, studuisse virtutibus, et edomandis animi affectibus. « Vana est enim philosophia, nisi in actionem emanet, uti vana est medicina, ni morbos curet: ita et Philosophia, ni vitia animæ, » ait Plutarchus. Quarto, Moses hisce annis vacavit orationi et contemplationi, qua preparabatur a Deo ad tanti populi regimen, uti mox patebit.

Jactant se homines, et volunt esse quod non sunt, dicuntque: Ego sum dives, ego sum nobilis, ego sum sapiens: qui vero humiles sunt et sapientes, qui se et Deum cognoscunt, dicunt: Deus est bonus, est dives, est sapiens, est sanctus, ego non sum; et per hoc meretur divina sapientia, bonitas, sanctitas, omnisque boni et esse participes fieri. Quocirca Christus Dominus apparens B. Catharine Senensi, eidem dixit: «Nostin, filia, quis sim ego, que tu? beata eris, si id scias. Ego sum is qui sum; tu es illa, quæ non es.» Et rursum: «Filia, cogita de me, et ego cogitabo de te, semperque curam tui geram;» fecit id ipsa humiliter se, et annihilans habitansque in suo nihilo: itaque elevabatur ad pelagus immensum esse divini, omniumque ejus perfectionum, totaque accendebatur in ejus amorem et laudem continuam.

Pulchre et fuse idipsum «non sum,» pertractat D. Henricus Suso, *serm.* 2. «Deus, inquit S. Basilus, fecit mundum: ut bonus, utilem; ut sapiens, pulcherrimum; ut potens, maximum. Si hæc didicerimus, nos ipsos agnoscemus, Deum cognoscemus, conditorem adorabimus, Domino serviemus, patrem glorificabimus, nutritium diligemus, benefactorem reverebimur, auctorem presentis et future vite colere nunquam desinemus.»

Gentiles docerunt solum Deum esse.

Hanc Dei notionem et Theologiam ab Hebræis, ut videtur, hausert et cognoverunt Gentiles. Refert Eugubinus in templis Ægyptiorum illud Dei emblemata inscriptum fuisse: «Ego sum quod fuit, quod est, quodque futurum est, velum meum nemo unquam revelavit.» Sic et Plutarchus, lib. *De Iside*, refert in Ægypto signum, quod Sais est Minervæ, quem eandem putat Isin esse, inscriptionem habere hujusmodi: «Ego sum universum quod fuit, quod est, et quod est futurum; flammæque meum nullus mortalium aperuit unquam.» Vide Goropium in *Hermathena*, lib. V, fol. 106, ubi contendit ex Plutarcho per Isidem divinam Sapientiam intelligi, Isidisque nomen idem sonare, quod, «est, est.» Thales quoque, rogatus quid esset Deus, respondit: «Quod semper est, neque principium habens neque finem.» Hoc et spectasse videtur Parmenides, cum ait «omnia esse unum ens immobile.» Hinc etiam in Apollinis Delphici templi foribus inscriptum erat primo, *ἴσθι σεαυτὸν*, *Cognosce teipsum*, quo Deus templum intrantes quasi salutans admonerat, ut seipsum noscerent. Secundo, *τί, id est, tu es*, qua voce ingredienti templum, quasi Deum ipsum resalutantes, solum ipsum vere esse confitebantur. De qua re vide ex Plutarcho Eusebium, lib. XI *De præpar. Evang.* cap. VII, ubi inter cætera docet solum Deum esse; cætera enim cum in fluxu sint, continue mutari, magisque corrumpi quam esse: «Corrumpitur enim, ait, juvenis in virum, vir in senem, puer in juvenem, infans in puerum; et qui heri fuit, in eum qui est hodie,

quique hodie est, in crastinum; manet autem nullus idem. Nullus enim est idem, sed omni momento circa phantasmata commutatur. Quomodo enim, si simus idem, aliis nunc quam antea gaudemus? Alio modo amamus atque odimus, aliis passionibus movemur, non eandem figuram, non eandem de rebus sententiam habentes. Denique Plato in *Timæo* docet solum Deum propriis esse; cætera vero que oriuntur et commutantur, verius non esse quam esse.»

QUI EST, MISIT ME AD VOS. — Hebraice rursum est *אֲנִי אֵלֶיךָ*, id est *ero*, sive sum, «misit me ad vos.» Noster et Septuaginta personam primam in tertiam commutando, clarius vertunt, *qui est*. Hinc nomini Deus mox aliud addit, quod cum notam Hebræis tessera Moses afferat, dum subdit:

13. DOMINUS DEUS PATRUM VESTRORUM. — Pro Dominus hebraice est nomen tetragrammaton *יהוה יהוה*; pro Deus hebraice est *אֱלֹהִים* *elohim*; prius nomen est nature, posterius gratie, curæ et providentiae, *q. d.* Ego Deus, qui ita sum ipsum esse (quod est *Jehova*), ut nolim hominibus desse, sed velim iis adesse, præesse et prodesse (quod est *Elohim*). Ita S. Augustinus tract. *de hoc Dei nomine*: «Ego sum qui sum.» Hinc probabiliter colligit Eugubinus, Cajetanus, Genebrardus, Barlaminus et alii, nomen tetragrammaton esse idem cum eo: «Ego sum qui sum.» Primo, quia Deus, qui ante filiis Israel per Moses dici jussit: «*Jehova misit me*;» jam iisdem dici jubet: «*Jehova misit me*.» Certum autem videtur, uno et eodem nomine jussisse se vocari; ergo nomenclaturam suam, quam prius per verbum expresserat Deus, dicens: Sic dices filiis Israel: «*Qui est, misit me*;» hic per nomen exprimit dicens: «*Jehova misit me*.» Secundo, quia hoc cap. Moses studio semper Deum vocavit «*Elohim*,» donec Deus ipse nomen: «*Ego sum qui sum*,» sibi indat; deinceps vero usurpat tetragrammaton *Jehova*, quasi Deo jam inditum, idemque cum «*Ego sum qui sum*,» idem magis patebit cap. VI, vers. 3.

HOC NOMEN MIRI EST IN ÆTERNUM, ET HOC MEMORIALE MEUM, — quo scilicet memorabuntur mei, invocabunt et laudabunt me filii patriarcharum secundum carnem, et post eos Christiani, qui sunt veri Israelitæ, et filii Abraham secundum fidem: icti cum Abraham est exhibita; ita ut per Christum non deleta, sed renovata potius et illustrata videatur Abraham, Isaac et Jacob memoria.

IN GENERATIONEM ET GENERATIONEM. — Hebraice, *in sæculum sæculi*, id est, per omnia sæcula, quovis sæculo.

16. VISITANS VISITAVI VOS, — respexi et vidi vos. Ita vertit Noster cum Septuaginta melius quam Chaldeus, qui vertit, *recordatus sum vestri*; nam presentium malorum non tam est memoria quam visio; hic Deus visitat in bonum, alias in malum, ut *Psal.* LXXXVIII: «*Visitabo* (id est castigabo) in virga iniquitates eorum.»

17. ET DIXI, — mecum statui et decrevi.

18. ET ADIUBET VOCEM TUAM, — tam leta et optata de eorum liberatione nuntiante, memores compleri jam hoc liberationis tempus Abrahamæ predictum, *Genes.* xv, vers. 16; ibi enim dicitur: «*Generazione autem quarta reverterentur hæc*,» jam autem exinde est generatio quarta.

VOCAVIT NOS. — Hebraice est, *occurrit nobis*, id est, sponte se obtulit et apparuit nobis vocans nos, videlicet ad sacrificium. Alienius vertit Chaldeus, *invocatus est super nos* (1). Hanc speciem sacrificii voluit Deus Hebræos apud Pharaonem prætexere celande fuge, ne Pharaon abitum populi palam factum, et aperte postulatum statim abnueret. Ut ergo Moses populum educat, ad idque veniam a Pharaone impetret, jubetur ei dicere, Deum velle ab Hebræis coli extra Ægyptum in deserto; quod verum erat; dixerat enim Deus, vers. 12: «*Immolabis Deo super montem istum* (Sina).»

IBIMUS. — Hebraice, *et nunc eamus quæso*, id est, liceat ire nobis.

VIA TRIUM DIERUM, — moderata petitio; nam si longius iter et tempus peteret, excusari merito videretur rex negans abitum, tanquam qui jure de fuga Israelitarum suspicaretur et metueret. Nec mendacium hic, sed silentium integræ veritatis, intervenit: ituri enim erant itinere trium dierum, et hoc dixerunt; sed longius deinde ituri erant in Chanaan, et hoc tacuerunt.

Mystice, via trium dierum est via fidei, spei et charitatis. Rursum via contritionis, confessionis et satisfactionis, quibus præparamus nos, et tendimus ad sacrificium Eucharistiæ.

ANAGOGICE, VIA TRIUM DIERUM IN CÆLUM EST VIA Christi, cujus prima dies est dies passionis et mortis ejus; secunda dies, est descensus ad inferos; tertia, est dies resurrectionis ejusdem. Ita S. Augustinus, *serm.* 90 *De Temp.*

19. SED EGO SCIO QUOD NON DIMITTET VOS. — Præmunuit Mosen et Hebræos Deus, ne repulsam apud

(1) Quæ tamen versio multis probatur. *יהוה* enim esse hic pro *יהוה*, vix dubium. Sensus igitur est: Nos vocamur Jehovæ populus, ipse est Deus noster; ibimus igitur, tua venia, etc.

Pharaonem passi animis concidant, cooptisque desistant.

NI SI PER MANUM VALIDAM, — per decem plagas, et maxime per eadem primogenitorum, quam ego iis inferam. Chaldeus vertit, *nisi per timorem fortem*, quem ego iis hæc plagis incutiam (2).

22. A VICINA SUA ET AD HOSPITA SUA. — Hinc patet Ægyptios fuisse permixtos Hebræis in terra Gessen. SROLIABITIS ÆGYPTUM. — Chaldeus vertit, *evacuabitis Ægyptum*; radi enim, *רִיק* hebraice et chaldaice significat esse vacuum.

Nota: Hebræi, abeuntes Ægypto, eam spoliarent non rapina, sed justo donationis Dei (qui omnium est dominus) titulo. Donavit eis hæc spolia Deus, primo, ut castigaret luxum et injustitiam Ægyptiorum. Secundo, ut Hebræis, qui gratis servierant Ægyptiis, hæc spolia loco pretii redderet. Tertio, ut eis daret materiam, quam postea in tabernaculi fabricam offerrent. Hinc *Sapientia* VII, vers. 7, de Hebræis dicitur: «*Reddite justis mercedem laborum suorum*.» Unde et Tertullianus, lib. IV *Contra Marcionem*, cap. XXIV: «*Instincti sunt, inquit; Hebræi non ad fraudem, sed ad mercedis compensationem, quam alias a dominatoribus exigere non poterant*.» Licet enim regis unius imperantis, et Hebræos opprimentis hæc fuerit tyrannus, multorum tamen ei obsequentium, et ablandientis ei plebis injuriam sensere Hebræi; et vero, etiamsi solus rex vim fecisset, juste tamen, justoque bello ejus subditi fuissent appetiti.

Tropologice, spolianda est Ægyptus, id est, ea quæ in Ethniciis Philosophis et Oratoribus elegantia sunt, tanquam ab injustis possessoribus, in nostrum usum sunt vindicanda. Ita S. Augustinus, lib. II *Doctrin. Christ.* cap. XI; Rupertus, Nyssenus et Prosper, lib. I *De Promiss. et Prædic.* cap. XXXVII. «*Nonne aspiciamus quanto auro, argento et veste suffraginatus de Ægypto exierit Cyprianus doctor suavissimus, et Martyr beatissimus? quanto Lactantius? quanto Victorinus, Optatus, Hilarius?*» inquit S. Augustinus.

(2) Pro *nisi* alii hebræi vertunt *ne*, qui sensus frequentior est voc *לֹא*. Vers. 21. *Critam dabo*, id est, faciam ut quod petitis, tandem obtineatis.